

**Agong Seru Anggota Parlimen Tumpah Taat Setia Kepada Negara  
Bernama  
10 Mac, 2014**

KUALA LUMPUR, 10 Mac (Bernama) -- Semua anggota Parlimen diseru supaya sentiasa menumpahkan taat setia tidak berbelah-bahagi kepada negara serta memelihara, melindungi dan mempertahankan Perlembagaan Persekutuan.

Yang di-Pertuan Agong Tuanku Abdul Halim Mu'adzam Shah bertitah semua anggota Parlimen perlu melaksanakan tugas dengan jujur, amanah, penuh dedikasi dan tanggungjawab.

"Sebagai wakil rakyat, Ahli-Ahli Yang Berhormat hendaklah menunjukkan contoh yang terbaik kepada rakyat dan sentiasa mengamalkan sifat-sifat terpuji terutama sepanjang berada dalam Dewan yang mulia ini," titah baginda ketika merasmikan Mesyuarat Pertama, Penggal Kedua Parlimen Ke-13 di sini Isnin.

Dalam pada itu, Seri Paduka berbangga dengan peranan telah dimainkan oleh semua anggota Parlimen dalam mewakili suara rakyat melalui isu-isu yang telah dibawa dan dibahaskan secara berhemah di Dewan Rakyat.

Baginda bertitah berkat kerjasama dan semangat perpaduan di kalangan anggota Parlimen, pelbagai rang undang-undang dan usul menyentuh kehidupan rakyat telah diluluskan dalam sidang Parlimen pada penggal lepas.

"Ini membuktikan kematangan sistem demokrasi negara dan kesediaan kerajaan Beta untuk mendengar serta mempertimbangkan sebarang cadangan daripada mana-mana pihak, demi kemakmuran negara," titah baginda.

Seri Paduka juga mezhahirkan rasa sukacita apabila Agenda Transformasi Negara sudah mula membuah hasil dan yakin ia akan membawa kemajuan dan kemakmuran yang mampan kepada rakyat dan negara dalam jangka panjang.

Menyentuh mengenai beban kenaikan kos sara hidup, baginda bertitah dalam menuju ke arah negara maju berpendapatan tinggi, kesejahteraan hidup rakyat sentiasa menjadi keutamaan kerajaan.

"Justeru, pelbagai inisiatif dilaksanakan untuk membantu meringankan beban rakyat. Beta menyeru agar kerajaan memperbanyakkan lagi Kedai Rakyat 1Malaysia di seluruh negara dengan sekurang-kurangnya sebuah dibina di setiap kawasan Parlimen.

"Beta percaya dengan usaha-usaha secara berterusan dan bersepadu, kenaikan harga barang dan kos sara hidup rakyat akan dapat diselesaikan secara holistik. Beta juga menyeru para peniaga supaya berlaku jujur dalam menjalankan perniagaan agar hasil yang diperoleh diberkati," titahnya.

Mengenai perubahan iklim global yang mengakibatkan berlakunya peningkatan kejadian bencana alam seperti banjir dan cuaca panas serta kering, baginda berharap semua pihak dapat bekerjasama untuk memastikan kualiti udara berada di tahap baik.

"Beta juga menzahirkan rasa simpati dan takziah kepada mangsa-mangsa yang kehilangan ahli keluarga, pendapatan serta harta benda (akibat bencana alam). Beta mengucapkan terima kasih atas tindakan pantas pihak kerajaan dan semua pihak yang sudi menghulur bantuan," titah

baginda.

TuanKu Abdul Halim menyeru agar kerajaan mempertingkatkan usaha bagi mewujudkan persekitaran kondusif bagi membolehkan warga emas melalui hari tua mereka secara aktif dan produktif serta diberi perlindungan dan penjagaan yang sempurna, jika mereka memerlukan.

"Beta percaya ramai golongan pesara mahu dan mampu menyumbang dalam membantu negara demi kesinambungan pembangunan yang telah dikecapi bersama dengan berkongsi pengalaman luas yang mereka miliki," titah Sri Paduka.

Sementara itu, baginda berharap pertumbuhan ekonomi akan lebih kukuh tahun ini dan menyeru semua pihak bersikap realistik dan bersedia menghadapi persekitaran ekonomi dunia yang semakin mencabar.

Mengenai pelaksanaan Cukai Barang dan Perkhidmatan (GST) pada April 2015, baginda menyeru kerajaan dan anggota Parlimen untuk bersama-sama memberi kefahaman kepada rakyat mengenai GST sebanyak 6 peratus yang bukannya cukai tambahan tetapi menggantikan Cukai Jualan (10 peratus) dan Cukai Perkhidmatan, (6 peratus) sedia ada.

-- BERNAMA

Copyright © 2014 BERNAMA

Source: <http://www.bernama.com/bernama/v7/bm/newsindex.php?id=1020687>